

0 10 20 30 40 50 60 70 80 90 100 110 120 130 140 150 160 170 180 190

Inches 1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33
Centimetres

井 澤

2548.07
2381

Kodak Color Control Patches

© Kodak 20

祭

嘯

歲豐四季歲坊
中廟中奇重物

年譜

天津沈峻存圃氏手訂

男兆灃輯注

余作字吟詩外無他嗜遊跡半天下計歸田
已越廿載今年七旬有五矣循省生平愧無
足述惟淡泊寡營廉隅自飭不貪不刻不妄
交不隨俗差不負 先君庭訓暇仿古人自

作年譜之例信手追錄并詳敘世系詮次歲月以留示子孫

七世祖雁山公諱堯孚明官溧陽縣丞贈南京吏部尙書

六世祖中霖公諱譜明嘉靖癸卯舉人贈南京吏部尙書

五世祖雷門公諱應文明隆慶戊辰進士累官

南京吏部尙書贈太子太保謚莊敏

高祖鴻儀公諱景怡明崇禎己卯舉人

曾祖子重公諱宏嗣太學生

祖允齊太學生 贈廣東吳川縣知縣

父德三公諱世華增廣生官江西廣豐縣巡檢

贈廣東吳川縣知縣

母氏周 封孺人

三韓徐壽保填諱

乾隆九年甲子

正月二十四日卯時余生於天津時 先君

年三十一歲 先妣年三十歲兄嶧長余二

歲 原注弟崐 余初名曰名揮更名峻字丹厓

少余十歲 號荃浦一號存圃

十年乙丑二歲

十一年丙寅三歲

十二年丁卯四歲

十三年戊辰五歲

隨 先君之江西南豐縣龍池巡檢任

十四年己巳六歲

始八塾受業於明經杜夫子 文明 書齋前方

池一畝廣植花木頗具幽雅之致 在廣豐有懷杜夫子

句人離十載情如舊
路隔千山夢亦難

十五年庚午七歲

十六年辛未八歲

先君調廣豐縣洋口巡檢公餘自課嘗訓峻
曰吾家先世懿行不可殫述 六世祖雁山
公浙江通志載同舍某被逮甚急公百計脫
之某自分無可報而陰使其妻夕為公驚起

趨戶外叱曰吾以義脫汝而汝以不義汙我
何遽引避昆季五人當析箸取其瘠者羣從
子弟悉授室成立之里有緩急各厭其意而
去官溧陽縣丞有築堤功 高祖莊敏公明
史載萬曆三十九年方大暑省刑而熱審矜
疑疏未下公以獄囚久滯乞暫豁矜釋者未
報明日盡按囚籍軍徒杖罪未結者五十三

人發大興宛平二縣監候乃以疏聞神宗亦
不罪也行水金鑑載公署工部時通惠河決
嚙陵梗運委曲協濟河臣得以奏功獻徵錄
載公爲刑部侍郎時御史曹學程諫日本封
事繫獄十年公疏請得改戍咸甯知縣滿朝
薦忤稅奄梁永被逮公疏救之 伯祖魯瞻
公諱之泰紹興府志載公弱冠通諸史推官

陳子龍亟稱之魯王授中書舍人從八海遣

至甯波使招兵爲里人所白執繫會城不屈

死 莊敏公著有奏議十二卷順天府志六

卷 採入 四 曾伯祖君復公諱景初著有

萬蘭堂集十卷載餘姚縣志峻謹識之不敢

志

十七年壬申九歲

十八年癸酉十歲

十九年甲戌十一歲

二十年乙亥十二歲

受業於文學鄭夫子

二十一年丙子十三歲

二十二年丁丑十四歲

受業於文學俞夫子

映漣

二十三年戊寅十五歲

始學爲詩與伯兄倡和者十年

二十四年己卯十六歲

夢中得句千峯月色窺吟筆一片江聲送酒

船

二十五年庚辰十七歲

肄業豐溪書院

二十六年辛巳十八歲

仍肄業書院

二十七年壬午十九歲

受業於孝廉蔣夫子

光祖

二十八年癸未二十歲

彙錄先正格言二卷名曰資鏡錄

二十九年甲申二十一歲

與諸暨陳月泉先生

法乾

遊先生工詩著有

丹棘園稿風格在元和大厯間朝夕談藝頗

承指授於其歸也詩以送之曰白髮蕭然雪

滿梳扁舟東下落潮初吟過釣渚山皆秀夢

八漁莊柳半疏卜宅應延三徑客教兒還讀

五車書青鞵布襪他年事自愧飛揚興不如

月泉先生與劉鳳岡鳴玉童二
樹鈺齊名有越中三子詩行世

三十年乙酉二十二歲

山陰余芝巖先生

洪起

工詩善畫與余篤忘

年交高石舟鄭宗周翼周兄弟日夕過從極

一時倡和之樂九月隨侍先君解餉貴州

因得縱觀山川風物之美欣喜激昂得詩甚

夥

三十一年丙戌二十三歲

二月自貴州回

黔中書所見詩可憐霜足步
蹒跚裙袂深深覆曉寒記得

玉珂依若過笑呼女伴看流官晴日山城霧

影低呀嚶山鳥踏枝啼共言此日罷歌舞小

市筠籃買刺梨竹郎祠畔水潺潺短笛相逢

棘樹間連臂踏歌何處去大家乘月上空山

生計樵蘇力不違短衣椎髻耐風威著黔行

日斜負弩拈雙箭賭射南山乳虎歸

草一卷

得詩百餘首

編壬午至丙戌所作詩二百

餘首為東屋集四卷

三十二年丁亥二十四歲

著竹香亭稿一卷 得詩數十首嗣併入研北集

三十三年戊子二十五歲

八月隨侍 先君赴南昌尋回九月從姪以

顯舉於鄉著研北集一卷 得詩數十首

三十四年己丑二十六歲

選唐詩四卷名曰唐詩宗

三十五年庚寅二十七歲

八月隨侍 先君赴南昌偶步裝潢家見壁

間橫看書絕句三首谷口橋邊日未斜先尋

宿處近梅花分明聽得吹長笛祇隔紅闌第

一家四簷春雨夜浪浪記得吹笙近竹房三

十五年江海夢又隨飛雁過瀟湘曳杖來尋

處士家迢迢空翠隔煙霞山童揖客松間坐

笑背春風掃落花詩格在宋元間紙尾署閩

中葉芬或卽手作歟尋回

三十六年辛卯二十八歲

時先君將六旬頗倦於仕欲乞休太孺

人曰作宦二紀無寸椽尺土之資歸將奚恃

不若遣次兒先歸就試俟有成立徐圖解組

未晚也先君聽之飭具裝回籍二月附糧

艘北旋七月始抵津不及與試

三十七年壬辰二十九歲

讀書徐飛山先生

浩家

三十八年癸巳三十歲

應邑試邑侯南昌彭公

良騫

拔取第一受知

於學使安溪李延彬先生

宗文

入縣學第一

四書題行天下之達道得志與民由之

三十九年甲午三十一歲

應鄉試中副榜第二十八名座師吏部侍郎

後官禮部尚書新建曹文恪公秀先內閣學

士蒙古嵩撫棠先生貴房師大理少卿嶧

周立堂先生於禮四書題子謂伯魚曰女為

周南召南矣乎大德川流小德敦化由君子

觀之則人之所以求富貴利達者其妻妾不

羞也而不相泣者幾希矣詩題相馬九方歎

四十年乙未三十二歲

二月考取八旗教習第三名閱卷官為刑部

侍郎後官大學士王文端公杰工部侍郎後

官尚書彭文勤公元瑞嵩撫棠先生四書題

以兄之室則弗居詩題方珪圓璧三月補鑲

白旗官學四月先君解組歸十月娶曹孺

人通州前湖南保靖知縣履平先生雲昇季

女徐飛山先生執柯也

四十一年丙申三十三歲

東巖兄補縣學生

四十二年丁酉三十四歲

吏部考職余名列一第一名授職州同應

鄉試檢討昭文季綱齋先生

學錦

力薦不售

挑取四庫館膳錄

四十三年戊戌三十五歲

二月教習期滿引

見以知縣用官學生蘇保丁酉拔貢中庚子舉

入仕至知府亮保登辛丑進士刑部主事充

甲寅廣西副考官仕至少詹事

四十四年己亥三十六歲

應鄉試爲刑部主事鉛山熊謙山先生

枚所

薦仍不售

四十五年庚子三十七歲

館於張嘯崖中書

虎拜

家城東錦衣衛橋畔

思源莊張氏別業也南杓先生

映斗

有句云

須栽綠竹看新筍更種黃花待晚香卽其地

拱之別駕

映辰

邀寓數月得詩數十首 余

以疾未與鄉試東巖兄中副榜第二十八名

先是余與伯兄邑試入學皆第一至是中式
名次亦適合津門傳爲佳話

四十六年辛丑三十八歲

與吳念湖

人驥

徐朗齋

炯

東巖兄時相倡和

編己丑至辛丑所作詩三百餘首爲蠡軒集

四卷

四十七年壬寅三十九歲

四 八月十四日 先君棄養 享壽六十有九

四十八年癸卯四十歲

守制家居

四十九年甲辰四十一歲

守制家居十一月服闋入都

五十年乙巳四十二歲

讀書都中

五十一年丙午四十三歲

余雖以知縣注銓猶屢應鄉試是年東巖兄

中舉人第十四名余卷為編修於潛黃稼堂

先生 瀛元 所薦以額滿被遺丁酉至是凡三

薦終不售乃謁選人十二月選廣東吳川知

縣

五十二年丁未四十四歲

二月攜眷赴粵泝潯陽度庾嶺嶺有碑昔人

題曰雁同人遠唐蝸寄先生英爲粵海權使

北旋改題曰人回雁遠閱之愴然不勝天末

之感五月抵廣州六月蒞吳川任吳川竹枝詞槩船脚

艇網門長趁曉招呼采海忙贏得年年生意

好蘆笙銅鼓賽康王尺帛蒙頭懶著裙縲絲

辛苦夜初分閨中織得黃麻布嫁筭何勞錦

繡文蘋紫蕉黃未足誇金盤三月薦西瓜新

年方說菘心美屋角齊開扁豆花幾曾夜試

海南香蒟葉檳榔與客嘗斗大一洲通費舶

不須重話舊龍翔限門飛雪延華月八景詩
成畫壁多何似老農歡樂歲古榕樹下唱山
歌潮田多種長毛穀海岸時牽巨口鱗
徭役全無官吏好此中真可避秦人吳川

蕞爾區實濱海重地在高州府治南百三十

里城周四里許境轄三百餘里南二十里曰

限門門廣盈丈雙磧對峙當風濤搏激雪浪

山擁聲聞遠邇望瓊雷僅隔衣帶水風勁一

瞬可至東南百四十里曰硃洲宋末翔龍縣

故址也縱橫可四十餘里環以大海東怪石

浮沈數十里西無石通舟楫南北多石皆有

港可泊舟時海氛未靖余亟與遊擊高君瑞

鳳守備陳君輝巡檢吳君廷成熟籌防禦章

程幸獲無虞乃日延接紳士陳躍池孝廉張

元林慶章明經泰雯輩詢問閭疾苦稔知地

瘠民貧日形凋敝思有以休養生息之一切

裁革惟便民是務嘗輕騎入鄉催徵不假手

胥吏俗健訟余剴切曉諭毋為刀筆簧鼓傾

產失業責躬詩云不恃鞭扑威所願風俗厚

閭閻肥何妨長官瘦又云小邑歎捐瘠撫綏

使性馴叱咤已不忍矧敢鞭扑頻蚩氓頗見

諒訟牘罕跪陳突報流泗岸有械鬥者使吏往覘則

甲與乙為爭古祠地甲糾子弟百餘人乙應

之持梃將發矣吏愆余速往擒余曰是必有

故當不難以一言解往擒則徒多傷人甚或
激成巨案亟檢卷見乙名與在京某似屬弟
兄曰得之矣乃牌示曰案控多年久未勘訊
本官初莅茲土毫無成見候詳委賢員會勘
公斷毋逞兇干咎命一白頭役持往懸祠壁
兩姓數百人頓散嗣詢紳耆果甲疑乙預行
重賄官將偏袒忿極思逞見示大悟遽解去

終余任無鬥者

五十三年戊申四十五歲

三月以久晴祈雨中丞札詢得雨否夜適雨

責躬詩云臥聞茶鼎沸失喜響
簷溜起視青天高芒刺儼在負六月赴碣洲

巡視海洋作防海議畧曰高郡東南距海以
電白吳川爲要害電白外有大小放雞吳川
外有碣洲其地下鄰雷州白鶴錦囊南至海

安自電白放雞而南礮洲懸其中暗礁暗沙
難悉數非熟諳者莫敢入實足爲高郡之護
然鄰境洋面未靖則吳邑防範宜嚴余以爲
防海之策外洋利哨探內洋利攻擊善攻擊
者在勤操演設團練夫船猶馬也水師之船
若久泊內港絕不行使則人船不相習不知
風水之性不歷波濤之險臨敵方傾覆是懼

烏能制勝故首勤操演兵以衛民不若使民
自衛編查各村壯丁分領以團長統領以團
總俾老成紳耆充之官予軍火以時操練無
事則守望有事則出戰旣可補汛兵之不足
而居民亦藉以保護其身家故次設團練而
其要則尤在絕盜需蓋盜船必資料糧愚民
趨利若鶩透漏交通事所不免應嚴查濱海

漁船祇許單桅平底朝出暮歸不許雙桅尖
底經旬不返凡損料硝磺之類悉厲禁接濟
內斷盜自立散至堵禦之法宜合而不宜分
惟有固海岸防港口專致力於盜所從入之
途而已 訟庭無事子衿愛余書恒以冊索
臨欣然應之 感懷句獄訟稀少民氣
樸衙舍如寺無關防 作聽訟
說畧曰聽訟宜公宜明尤宜速倘訟不卽訊

訊不卽結則良懦將甘心隱忍惟曠時失業
是懼不敢赴訴公庭奸宄愈縱恣而無所畏
余宰吳邑始至每期投詞者數十人爲立斷
不辭勞久之十數人余疑曰得毋冤抑有不
能自達者乎密訪無有也久之僅數人余又
疑曰得毋胥役有藉端勒索者乎嚴察無有
也恍然曰是立斷之故也請託路絕也刁唆

技窮也余因是亦稍逸焉夫喜清靜者必自
憂勤始蓋人爲一事專心致志畢力經營歲
事而後卽安及其成也輒有餘閒可以漸及
於其他而庶事自無叢脞之慮余嘗謂天下
惟勞者能逸益信

五十四年己酉四十六歲

七月颶風作壞商艘溺死無算慘不忍觀余

有詩紀事曰聲鏗旬勢飄忽自東西自南北
屋瓦飛大木折江海立捲崩雪心殼鯨目昏
炫不得食坐達旦妻兒啼當奈何君勿啼苦
者多率僚吏察比戶悲蕩析淚如雨巨艦碎
尸蔽江幸不死護還鄉颶風息間胥來雞犬
走云禳災天降怒人則那風猶可公殺我末
語蓋示戒也考南越志曰颶風者具四方之

風也常以五月發嶺表錄異曰嶺嶠夏秋雄
風曰颶裨海紀遊曰颶之尤者曰颶又風四
面皆至曰颶不知颶雖暴無四方齊至理譬
如北風颶必轉而東而南而西不四面傳徧
不止是四面遞至非四面並至也颶驟而禍
輕颶緩而禍久且烈又非常之風常在七月
縣志載颶風作亦多在夏秋間先是四十八

年六月颶風大作城牆爲圯至是益壞余率
紳耆捐修完固作築城引曰孤城臨海隅女
牆何巖嶽颶風一震撼唇亡齒亦缺登登築
千夫言言排萬堞重關患豫防走險外有截
牡鑰畀戎師慎爾旌旗列漆光蕩蕩不可上
曾聞杞婦能度紡將軍解甲臥貔貅太平時
節鏡歌響勸君休築城有城無利兵試看城

垣堅似鐵門軍醉臥清宵月亦示戒也 吳
邑無歉歲客偶詢救荒之策余曰救荒無上
策備荒無下策客曰何謂也余曰備荒莫先
於重農事重農事莫先於籌水利凡爲司牧
者下車之始卽詳問境內山溪若何有無陂
塘溝澮壞者修之廢者復之虞泛溢爲患則
築隄以捍衛之水利旣興多備穀種如地恒

慮水則以不忌水者種之地恒慮旱則以不
畏旱者種之凡舍旁田畔以及荒山不可耕
之處相土所宜廣植果樹亦足以濟五穀之
缺乏若煙草之類悉厲禁或農家涉訟速爲
訊結俾不致曠廢時日如此則農事舉矣其
次莫要於立義倉義倉之穀不勸捐於凶歲
而勸捐於豐年法爲最善當師朱子社倉意

年譜
三
而損益之聽民自議自行以出入之數歸民
以賞罰之權歸官官民相制事可經久此皆
備荒之策也至於救荒之策則勸分也抑價
也遏糴也行粥也然皆不能無弊魯仕驥謂
勸分不若開渠抑價不若通商遏糴不若廣
糴行粥不若釐戶語極切當明林希元云救
荒有二難得人難審戶難有三便極貧民便

賑米次貧民便賑錢稍貧民便賑貸有六急
垂死貧民急餽粥疾病貧民急醫藥病起貧
民急湯米旣死貧民急募瘞遺棄之兒急收
養輕重繫囚急寬恤有三權借官錢以糴糴
興工作以助賑貸牛種以通變有六禁禁侵
漁禁攘盜禁遏糴禁抑價禁宰牛禁度僧有
三戒戒遲緩戒拘文戒遣使此皆救荒之策

也大抵災民宜分不宜聚勘災宜親不宜委
報災宜實不宜隱恤災宜徧不宜漏然必先
有備荒之法而後可行救荒之事亦惟先有
備荒之法庶不至有救荒之事范忠宣在襄
城時歲旱度來春必乏食遂盡藉境內客舟
召其主諭之曰民將無食爾惟販五穀貯佛
寺候缺食時吾爲爾主糶眾賈樂從所蓄無

慮數十萬諸縣饑而襄城之民不知是亦備
荒之一道也嗚呼以實心行實政尤存乎其
人十月乞休不果遣眷屬歸侍 太孺人
五十五年庚戌四十七歲

正月恭逢

恩詔加一級

勅贈 父文林郎

勅封 母太孺人並以本身妻室封典

賜贈 祖父母如例

縣學明倫堂久圯余捐俸重建書聖經刻於
屏風並建東西廊各三間五旬落成作記勒
碑於廊壁 硯洲地險阻大吏慮盜艇易出
沒督緝嚴厲將弁懼日久不獲盜干咎遂妄
拘海濱細民黃金印等十七人誣指邀功余

廉知其枉力請於大吏會同化州電白石城
諸牧令公鞫以事無左證得省釋 作折獄
論畧曰折獄以平矜釋躁從容詳細為主呂
刑曰非佞折獄言佞人不可以折獄也倘恣
其才辨以口給禦人致愚民應對失措遂謂
能窮其說塞其口炫聽斷之長為同寮所莫
及是直謂之佞不可謂之折獄又或好用刑

求無辜必將誣服路溫舒曰人情安則樂生
痛則思死捶楚之下何求不得凡折獄凶人
多用刑求而吉人不用也無才者多用刑求
而有才者不用也初入官者多用刑求而歷
練久者不用也不佞不酷然後可與言折獄
易賁象山火火雖明而在山下明不及遠故
曰明庶政無敢折獄旅象火山火至明而又

在山上明無不照故曰明慎用刑而不留獄
惟本之以公明處之以審慎無枉無縱而一
歸於平允仁恕庶祥刑之遺意歟十一月修
縣志志舊修於雍正初閱六十餘年多所闕
畧延林明經式中輩詳加纂緝書成作序捐
俸付梓 余顏堂曰安拙自跋云昔李孝基
所治郡邑雖甚劇至午卽卻掃隱几庭無人

跡有問者曰吾治無他省事而已夫省事在
安靜安靜在不煩擾煩擾之弊有數端條教
煩則惑民聽徵索煩則傷民財興作煩則勞
民力改革煩則驅民以所不習政事煩則強
民以所難堪官多一事民多一擾知其爲擾
而已之而民已不勝其病余宰吳四載矣事
省繁苛訟庭闐寂自安其拙而民亦安余之

拙也因以名堂云

五十六年辛亥四十八歲

二月慶章明經爲校刻粵遊詩二卷

丁未至
辛亥得

詩二百餘首 七月接家信知東巖兄於五月病卒

輓詩有句云羨君福分原非薄消受清閒五十年 今年兄五十壽余

作序寄祝未及達而已歿 太孺人春秋高

不知若何悲慟懸念不能釋八月以齏案去

官去之日士民泣送數十里

陳躍池孝廉張元句低眉自有

平反術強項猶留伉直風陳方流孝廉璋潤
句惋惜千秋存士論慈祥五載愜民心林慶
章明經泰雯句難得如君廉靜吏五年官瘦
萬民肥李若蘭茂才馥句去後纔知公政善
催科拙處活民多陳行一茂才式經句囊橐
千篇詩卷富香花百里淚痕多房御環茂才
貴綬句民因字好時求判官似僧閒日詠詩
林達品茂才鵝紳句海險籌長策田荒勸早
耕庭無鞭扑響野有誦絃聲令豈容強項民
偏悵別情錦囊貯佳什栗主奉長生畫師林
邦棟句繪圖尸祝家家
吳俗淳良五年僅勘
徧難繪冰壺一片心

一緩決罪人是月急足至驚聞 太孺人於

六月二十日棄養

享壽七十有七

一慟幾絕憶丁未

之官吳川 太孺人年高憚遠行誨之曰汝

此行良遠我不以為慮但當作好官時寄薄

俸以資甘旨我在家看諸婦紡績聽童孫讀

書差自遣也已酉乞歸養會事格不果未及

五載竟成永訣抱恨終天曷其有極 作授

經圖 韓樂餘先生是升題曰沈侯身著三升
布匍匐庭階聲不吐飲泣新遭慈母喪
投劾因逢長官怒是時羊城十月天籬菊正
綻霜華鮮披君行卷三歎息宰官那得如君
賢一行作吏烏可說計及肥家恣饕餮攜琴
載鶴師前賢轉笑經生太迂拙吳川治行元
道州春陵同調堪千秋催科不聞鞭扑響退
食時關早滂憂妻孥先遣津門去正恐慈親
動憂慮一官早視浮雲輕賓從閒來嘯冰署
偶圖面目紀歲時落落懷抱無人知人生有
子萬事足一經代授真鉉基沈侯宦情澹如
水沈侯歸裝薄如紙再出應焚誓墓文庶幾
不愧爲人子蔣香杜先生棠句我初識君面
慷慨軒鬚眉繼得讀君詩磊落攄肝脾因之

稔君政大遠俗吏爲先民保赤訓同體無畛
畦善教始門內道在善所推始知眾人母無
改慈
惠師

五十七年壬子四十九歲

寓廣州讀東坡詞云時見幽人獨往來縹緲
孤鴻影因以鴻影名寓齋偶午睡夢至山寺
盤紆雅潔旁有書室則先兄坐其中絕不問
家事案頭硬黃紙寫選體賦清麗可誦少頃

傳謁上座忽覺身無冠履倩沙彌取之率不應乃自詣兄所兄已他出但見題濁化堂三字於壁而已悵然賦之曰五濁塵中祇自煎何時化去到諸天琳宮梵宇無緣住強種人間作孽田與宗芥颿司馬聖垣余慵樓明府作沛戴小阮孝廉咸亨蔣香杜茂才棠寄塵和尙湘麓偕遊勺芳園滋圃協長壽寺白揆別業

雲粵秀諸山登鎮海樓相得甚歎皆有張松園廉訪朝縉吳曇繡觀察俊見余詩好之松園先生以贈公南坪詩稿屬校勘曇繡先生以彭竹林司馬翥小穀山房集屬校定暇輒以菩提葉寫經排悶八月被議効力新疆松園曇繡兩先生韓桂齡觀察對及同官吳邑士民咸釀金餽饘可感也瀕行乞小阮畫口

年譜
占句他年四海重相見更補天山霽雪圖小
阮和韻他日風煙歸萬里爲君更寫尙平圖
慵樓送別詩序云沈君存圃少負雋才數奇
屢躋場屋念太夫人春秋高亟思祿養俛就
一官來爲吳川令非其志也吳故瘠區君能
耐官職儉約如寒素五年未嘗至省門當路
罕識其面卒以細過被劾莫有爲緩頰者至

是來省愛君者相見恨晚而張廉訪吳觀察
憐才如命見其詩尤重之君獲戾甚微大吏
從嚴定擬二公爭之不得遂有西域之行人
甚爲扼腕君初不介意患難中不廢吟咏無
一怨尤語吾不知其胸中視榮落升沈爲何
事蓋其所得於心者多矣余曩承乏電白君
謬以余爲識途老馬有疑事輒以書來詢余

年譜
必竭其愚君亦多所採納故意氣尤相洽乃
者部檄敦迫君行且有日爰賦二章以誌遠
別之感云祿養何如菽水歡蕭然風味等無
官當年早說還家樂今日誰憐行路難信是
多窮詩律細卻因善病酒腸寬青鞵布襪從
軍去猶自狂吟興未闌吟得新詩手自編西
征直是賦歸田窮通有命當如是曲直憑人

或未然臣罪敢辭行萬里 君恩且去住三
年玉關迢遞勞相憶雙鯉何因取次傳二詩
能道余心曲非泛泛者比番禺周潤公古樸
不見客獨來訪余陳瑗齋都閩休官閒居素
不相識慷慨論交臨別以紫藤杖爲贈寄塵
和尚主大通寺方丈招飲賦詩別後致書數
千里慰問殆相知半在風塵外耶九月自廣

州買舟北上重度庾嶺瞻人回雁遠碑題不
禁惘然贛江放灘臨江舍舟登陸歷皖豫陝
甘除夕宿安定編二月至八月所作詩百餘
首爲羊城集二卷

五十八年癸丑五十歲

二月出玉門關過安西德協戎

成額

粵中舊

好也盤桓數日贈句平生結客多知己西出

陽關有故人三月過哈密哈密爲關外第一

要衝商賈雲集百貨俱備產瓜極甘脆四月

抵迪化

輪臺竹枝詞一水中分兩座城碧油
幢擁殿前兵鞞甯直接徠甯路祇

隔伊江十八程擁髻仙人下玉京萬峯晴雪
倚天明祁連秀峙三千里哈密遙連迪化城

馬牛量谷地分工沃壤清渠到處通校尉不
須誇戊己金穰歲歲兆年豐斗印朱文照眼
光分明蟲繆列三行

朝廷法物齊中外

也使蕃兒識典章瓜期幾載入重關不用饒
歌唱凱還好語寒衣休寄遠暫教少婦損紅
顏一拳紅石小於螺解報雙歧麥穗多料得

西池常獻壽年年持伴玉山禾懸薄人家畫
掩扉隔牆輒語聽依稀箇中幻出桃源路賺
得漁郎不忍歸柳條慣折他人手笑煞尋芳
逐斧柯那及秦宮花底活送迎懶唱渡江歌
遙連草地雅蘇臺上谷漁陽插羽回西北地
形天下脊斗杓明處五雲開梨園小部按涼
州也有科譚可散愁莫問當年回鶻舞饒他幾幅錦纏頭迪化州境在哈
密北千餘里有奇準噶爾故地也負雪山之
陰沃野千里水甘草肥額魯特之所遊牧伊
犁平定後寂無人煙乃於紅山嘴築城設烏

魯木齊辦事大臣乾隆三十年設都統去紅
山嘴八里別建城文職設道員一同知一其
地當四達之衝人民輻輳繁華甲關外四十
年改同知爲直隸州建學校歲取數人入州
學彬彬乎 文教覃敷矣 宜都護綿延入
署爲公子授經十月得家書知次兒兆灃讀
書甚慧爲之喜而不寐有句云老夫已愧承先志稚子猶能讀父

書與王九亭司馬篤祐龍雨樵鐸馬敬堂殿

翼孟茗浦曷王懋齋光陞王南林楠諸明府

定交著巾車集一卷壬子九月至癸丑三月得詩百餘首幻雲

集一卷癸丑四月至十二月得詩數十首

五十九年甲寅五十一歲

正月元旦隨都統望

闕一體行禮歲以爲例二月送九亭還全椒是月

從兄藻庭刺史名揆卒貧不能歸余經紀其

喪遣姪以承扶櫬北旋十月送敬堂還長汀

築問花草堂有句云乞取後來知此意問花聊比浣花人友朋

款洽殆無虛日余有句稱詩塞外惟龍沈縱

酒尊前有孟王茗浦南林紀實也是年著瓠餘集

一卷得詩數十首

六十年乙卯五十二歲

六三月集同人問花草堂余即席成七古一首

同人爭以紙索書醉墨淋漓興復不淺詩曰七人

四百三十四我最年少五十二入筵雜坐忘尊卑此時尚齒不以位絕少豐膳非故慳咄

嗟立辦等游戲窮荒尋樂鳥能拘免卻獻酬各自醉我來差晚更有人但願同歸偶然遂

兩年目送四喪還老去韶華益浮脆如何不飲令心哀放浪形骸天所賜黃昏月出雪山

白光照斗室炭初熾燈前笑舞且高歌眾賓既散吾亦睡四月都統授陝

甘總督余出署旋入書節使麟幕充記室七

月塞外燕社前即歸余戲語同人曰此不待

社者時方望赦不覺絕倒是年著倦遊集一

卷得詩百餘首

嘉慶元年丙辰五十三歲

二月赴庫爾喀喇烏蘇俗名庫屯時奇麗川先生

豐額為領隊大臣招寓挹璫山館倡和甚樂

先生善談論凡天地山川仙佛鬼怪靡不博

極古今淋漓盡致偶及仕進曰昔有人題盧
公祠云半生卻少功名分願與先生借枕頭
又有云我能借得先生枕睡到功名得意時
先生句竈頭尙有黃梁爨何事勞勞役夢魂
余亦擬句世間得失須臾事不及先生一枕
長八月麗川先生調葉爾羗余回迪化 雨
樵爲余作詩序有云元戎下土書記雍容都

護憐才館餐稠疊悵天涯之淪落不相識而
相逢念交分之纏絲亦有神而有道同游汗
漫情往興來獨立蒼茫唱子和汝起秋笳之
陣陣腸斷霜鐘眇歸雁之行行魂銷雪笠雖
淋漓盡致詎忍涉於怨尤卽慷慨當歌總不
離乎忠厚余亦有贈言云罷軍中之劍舞驅
筆如風坐幕下以論文清談似雪分牋擊鉢

豈讓飛卿響搗雙鉤居然張旭度花晨兮月
夕何暇言愁問潼酒兮駝羹且能加飯蓋幸
寄斯文於我輩遂巧成遇合於窮途文字交
深爲平生第一樂事 芝巖老友別三十年
矣作詩憶之曰兩世交情萬里身舊時青鬢
更如銀勞君對月愁相憶知我無書懶是真
老去醉吟多旅况夢中談笑半陳人相逢預

訂來生約往事模糊莫愴神 余作還山圖

已數載以北旋有日徵同人題詠兩樵句同

行我亦歸田里自愧輸君又遠遊秦斗庵 杓

句往事休論瘴海行殘年合有藏身地林廉

泉 雨化 句有酒直須連日醉餘年且把舊詩

編皆有真意是年著閱耕集二卷 得詩二百餘首

二年丁巳五十四歲

正月與雨樵茗浦懋齋同蒙

恩賜環二月自迪化啟行歷戈壁雪山入玉門關

四月至蘭州時軍興路梗淹留匝月余作醉

吟圖雨樵作聽泉圖茗浦作歸鞭圖懋齋作

納涼圖逆旅中互相題詠尋取道甯夏延綏

邊境入汾州達正定六月抵保定寓蓮池書

院水東樓與陳蒨浹先生

庭學

唱和時徐慨

餘觀察煇索觀余紀行詩至一夜離愁生白

髮滿天風雨渡黃河馬前得句三邊月酒後

懷人兩鬢霜朗吟再三以爲盛唐音節七月

還天津展謁先塋後親朋沓至歡然道故憶

丁未至是離鄉十一載行三萬餘里得詩千

餘首九月得桂舫先生寄余詩曰三載爲廉

吏卑棲百粵東深文心轉白噩夢我甘同地

冷哀鵲淚天迴退鷁風何當重把酒筵吹問
詩筒往先生仕高廉觀察爲余齟案罣誤改
補主事茲喜余歸轉用慰藉情見乎詞古誼
可感是年著獨笑集一卷

正月至六月
得詩百餘首

三年戊午五十五歲

正月長子兆霑入邑庠

韓聽秋孝廉

崧桂

齡先生兄也主講問津書院投詩過訪倡和

六無間徐鏡堂封翁

壽保

廿年前舊交也互以

詩稿相商定一日余造訪有童子出應曰得
毋詩人沈君耶因得句傲骨家人怪詩名稚
子知 署齋額曰游經滄海修到梅花

四年己未五十六歲

查憩亭明府

彬

亦舊交也出所作小息舫詩

稿屬商定余偶得句飲酒恰逢文社讌買花

不是宦囊錢憩亭亟稱之十月次兒兆澧入

邑庠

五年庚申五十七歲

館於莊栗堂運同

士寬

署與憩亭丁仙槎

知事

步瀛

倡和七月送兩兒秋試入都尋回

九月喜故人蔣香杜

棠

登北榜

後更名廷恩

六年辛酉五十八歲

與憩亭唐雪懷明府

奕恩

倡和五月吳川孝

廉李君

元琳

陳君

璋潤

過訪津門流連不忍

去六月大雨渾河決畿輔被水數十縣津城

不沒者三版沿堤官柳盡伐作薪憩亭作憶

柳詩慨然和之九月病時兩兒入都應試

是年

試期改

適華室女來侍疾余有句佳兒好去

排金闕嬌女親來侍藥鑪旋愈編丁巳秋至

辛酉所作詩二百餘首爲潘餘集二卷

七年壬戌五十九歲

二月夢中得句春雨著地香泥溫鶯鶯燕燕
桃花村醒續成之九月湮兒以歲試一等一
名食餼重陽雨不得登高憶自丁未後九日
常在客中已酉句漫插茱萸頻望遠北堂萱
草願親栽壬子句久客不知節重陽且放舟

癸丑句醉裏不知身是客踏歌攜得夕陽還
甲寅句登高不載酒恐觸故鄉情乙卯句撫
景休懷古思鄉只倚欄丙辰句且罷登高會
聊爲送酒人丁巳歸里閱數載不乏眺覽之
興今雖爲雨阻然酌酒看花優游三徑不爲
形役致足樂也詩曰喜無租吏攪幽齋畧有
黃花綴小階娛老甕頭村釀熟送寒天際雁

行排雨來暫罷登高會金盡難酬濟物懷笑

對茱萸憐汝健尋秋歲歲伴青鞵十二月東

坡先生生日譚子受山長

光祐

招同人拜先

生像問津書院分韻賦詩余即席云紗縠行

中人已去問津院裏燭猶紅而今願乞三千

歲廡下都稱孺子鴻

余家居六稔雨樵茗

浦仍作客除夕余有句爆竹聲中知樂歲梅

花驛裏歎征人縈懷舊雨黯然魂銷

八年癸亥六十歲

正月六十初度前數日次孫維鈺生喜得句

浮生忘甲子娛老得諸孫歸里後婚嫁粗畢

課子抱孫家庭聚順快然自得因名齋曰欣

遇

九年甲子六十一歲

年譜
數載來聽秋歸江南仙槎病歿雪懷歸山東
憩亭之任河南詩友落落老懷增感

十年乙丑六十二歲

余嘗謂詩道性情亦須論法然所謂法者行
乎其所不得不行止乎其所不得不止而起
伏照應承接轉換自神明變化於其中試看
天地間水流雲在月到風來何嘗著得死法

詩貴妙悟然空靈出自性府沈酣資於學力
若杜之北征韓之南山豈是一味妙悟詩語
欲洗去故常然當求新於理不當求新於徑
譬諸日月終古不易而光景常新詩不宜作
理語然亦非爲豔情發也詞或託諸男女義
實關乎君父香奩體形容褻嫚失國風不淫
之旨此旨一差卽遠名教曾有論詩絕句云

淑世不妨勤學步吟詩未許苦隨人掃除依
傍存生趣杜老香山見識真春水浮船力挽
弓文章蓄極始能通瓦盆種樹階攢石可有
擎天氣概雄新聲柔濮亦堪謳雞跣終難列
庶饒漫道國風原好色先從雅正辨溫柔亦
此意也九月學使陳荔峯先生嵩慶以塞下
曲試闈郡古學灑兒句征人六月據征鞍無

定河邊曉尙寒馬上不須回首望如今冀北
是長安余嘉其得體果爲荔峯先生所賞取
冠一郡從姪前蓬萊令以顯客死饒州以
懋被戕於宿州署中余爲設法歸其柩

十一年丙寅六十三歲

正月續修家譜

莊敏公修於明萬曆四十二年甲寅至是歷一百九十三年

年從姪以承聘宋氏女以無家未娶客江南

年譜
將十年矣爲招寓余家俾入贅於宋氏十二
月愚齋弟卒

十二年丁卯六十四歲

十月葬 考妣於城西雷莊新阡兄嫂祔焉

霑兒以歲試一等食餼

十三年戊辰六十五歲

五月病旋愈鏡堂老友數數過從時鏡堂以

子鐵崖司馬

錯

卒於貴州將往挈其眷北歸

萬里崎嶇衰年跋涉余哀之贈以句幾日夜

卽勞跋涉亂山荒箐倩人扶鏡堂爲泣下

栗堂作宦三十年慷慨揮霍迨解組幾不能

治裝津人士咸惜其去余贈句囊空方信平

時潔用儉何愁遠道難先生歎爲知己語

朱春泉司馬

鉉

三十年前同榜也過訪話舊

老友重逢不勝欣喜

十四年己巳六十六歲

四月得栗堂湖南書余與栗堂交最久知最

深書來云無家可歸就養猶子永順署因感

賦曰嗟君似我倏升沈老去窮愁恐不禁八

九年來知己淚四千里外故人心去思爭說

官聲好分祿無妨酒量深回首湘江舊遊地

杜鵑啼斷覓楓林

十五年庚午六十七歲

九月霑兒挑取謄錄澣兒登鄉榜

十六年辛未六十八歲

輯先正格言一卷訓兒輩曰竈嫗解余閱歷
所得亦附焉

十七年壬申六十九歲

十一月桂孫

維鈺小字雙桂

十歲質頗敏喜得句云汝

幼卻能勤嚮學吾衰還望早成名勉之也編
壬戌至壬申所作詩八百餘首爲鴻影集八
十卷余十一年來惟藉詩酒消遣信手塗抹不
復如向時之推敲盡致矣

十八年癸酉七十歲

正月七十初度徐鞠圃孝廉

通復

祝以詩余

依韻和之有句云七秩光陰如過客四方遊

跡卻存詩九月編生平所作詩手錄成帖名

曰欣遇齋集自序待梓 余家自 曾祖以

後三世單傳十月孫維璣生余有句一綫傳

三代兩兒得六孫追思先澤不勝慰幸是年

著味外編一卷

得詩數十首

十九年甲戌七十一歲

十雨樵下世逾十年偶檢所書詩冊感慨係之
題曰玉關垂老竟生還一卷新詩淚點斑天
遣知音同倡和醉看幕外雪漫山牖下何如
塞下雄纜拋盾墨又彎弓誰知頭白風塵裏
忘卻家山在夢中腸斷君家雪笠編原注雨樵詩集
名雪笠吟於今宿草慘風煙當時墨妙藏懷袖回
首輪臺已廿年豈是題襟寫勝遊炎州被逐

又庭州宦囊羞澀詩囊富只恐傍人笑未休
東鄰有樹葱鬱可愛因顏小廨曰借樹書
楹帖曰責已切莫過寬存心甯可過厚作人
必須喫苦處世不妨喫虧用勗兒輩

二十年乙亥七十二歲

曩在江右官署與東巖兄植卉論文垂二十
稔兄亡已逾廿載常夢見如平生歡感賦曰

我夢衙齋好聯牀聽雨時幾株池畔樹數卷
篋中詩調膳高堂樂看山蠟屐隨遐思眞隔
世猶剩鬢邊絲目昏心倦戒不作詩時於
酒後口占韻語聊以志興

二十一年丙子七十三歲

三月得脾虛病數月始愈十二月喜故人林

慶章明經子

召棠

登鄉榜孝廉來書畧云先

生治吳時召棠始數歲及長家君數稱先生
德政學行交友以誠愛人以德旣檢篋中得
與家君簡帖詩章三復景慕以不克摳侍左
右爲恨及辛酉己巳兩讀寄家君書雅懷舊
雨在遠不遺家君亦兩次奉書未審俱達記
室否召棠近承鶴樵先生邀至山左因晤周
明府詢悉先生優游杖履課子成名韓筆杜

詩與年俱劭私心慰藉卽馳報家君昨奉到
手諭命召棠親詣津沽躬請教誨祇以春試
伊邇未克取途試畢卽趨謁几席用展生平
嚮往之誠情致纏綿感歎不置且知老友健
在繼起有人何快如之

二十二年丁丑七十四歲

四月灑兒成進士改翰林院庶吉士吳川林

馨山孝廉

聯桂

贈詩有句云先是尊人官粵

東吳川作宰聲隆隆召父杜母歌吳儂先生
隨侍留泥鴻我亦竹馬之兒童今年相見京
衙衙泥金報捷圭從瓏喜倒吳陽百歲翁歡
騰眾口言喁喁善人有後歸天工 往歲修
家譜余識曰 曾祖子重公以 曾伯祖玉
集公官庶常北上及至 庶常公歿且無後

徬徨未有歸計遂占籍天津迨吾祖吾

父俱單傳不絕如縷嗣先君生余兄弟三

人皆有子子復有孫方繩繩未艾嗚呼孰知

其始之危若此哉他日有繼庶常公而起

者當祀諸宗祐以無忘本源茲澐兒叨入翰

林其敬念先澤世益滋培以紹我莊敏公

之遺緒庶常公忌日失考謹於喜故人王

每年四月初十日致祭

九亭司馬子鑄成進士入翰林曩余作還山

圖九亭題以騷體絕佳藏篋衍中幾三十年

余老矣猶及見兩家兒子作同年而九亭墓

已宿草重讀舊作能無愴然九月澐兒假歸

有得第原期娛白髮歸期那敢負黃花句余

最賞之原注內子九月初九生日十月促澐兒入都

二十三年戊寅七十五歲

三月爲甥女潘虛白夫人續刻不櫛吟作序
霑兒以史館書成議敘府經歷 歸里後索
書者衆二十餘年應之無倦色編甲戌至戊
寅所作詩百首爲味外續編一卷 詮次生
平自作年譜一卷

嗚呼此 府君自訂年譜也手澤依然而
府君竟絕筆於斯矣痛哉 府君生而

穎異讀書過目不忘爲文工且敏以隨

先大父官江西不得與試嗣北旋登副榜
充教習筮仕廣東潔已愛民治理井井尋
以失察私鹽案罣吏議効力新疆無論識
與不識皆爲 府君扼腕 府君初不介
意至則築問花草堂集同人觴詠其中與
前吳江令龍雨樵先生倡和尤相得不作

一怨尤語當道識 府君賢爭延入幕禮

遇優異歸田後自守堅確絕跡不入公門

惟以課不孝等讀書爲務兆灃幸成進士

入翰林方計迎養 府君京邸乃愆尤山

積禍及庭闈變生不測驟膺大故 府君

於嘉慶二十三年戊寅五月十二日卯時

卒於里第春秋七十有五痛哉 府君性

伉直胸無城府交友以誠不作翁翁熱雖

處困見義必爲宰吳川政尙寬簡不貪不

苛士民去思之念歷三十載如一日試南

宮歸者路過津門輒停舟造訪流連不忍

去生平甘澹泊於物無所嗜工書善詩出

塞後吟咏益富粵遊詩已梓行東屋黔行

研北蠡軒羊城幻雲瓠餘倦遊閱耕瀋餘

獨笑鴻影味外諸集凡詩三千首待梓
府君體素健不多飲食而精神有餘不嗜
藥餌而寒暑不侵嘗謂習勞者必壽享奉
不可逾量當爲天地惜福皆至言也 府
君臨卒時 北澗 備官京師不及親視舍殮
搶地呼天百身莫贖迨星奔歸里遺篋中
檢得此卷肝腸摧絕不忍卒讀擬取生平

著作及朋舊贈答詩章徧讀詳註用備家
乘祇以 老母在堂無以爲養行將餬口
四方藉謀菽水驪駒在道披閱弗遑校付
梓人姑俟異日執筆嗚咽墨與淚俱神思
惘惘不知所云 不孝男北澗 謹識

先中憲公自訂年譜藏篋中十八載矣茲
居 曹太恭人憂讀禮之餘旣校刊詩集

復輯注年譜付梓求

當代大人先生賜鑒焉

道光十五年乙未十二月

男兆澧 又識

維璫

孫維鈺校字

維瑞

咸豐四年歲次甲寅仲春孫維璫重校刊



曾孫 恩嘉 恩闈 同校

